

siatangura uvucungu

ma kuparaiahla sitakuamia maru mumuaku paraiahla kurarau hla
kilalialia, kana'a ia sikilalialia caihli uvucungu, mairahlu anuanu tahlana
Hla'alua kiariari ia uvucungu. ma angahlahlana uvucungu hla siliatunuluna,
kuparaiahla ahliakua rianu takualangulangua taiara, kuhlaisai angahli
hlilumuka maiatuhluhlu, miungu mariauvucungu hla umaai, sikuatitipa hla
kilalialiana rianu umarua palisia taku'i'iaru, sipakini siaravacungu hla
mavahlauvau arataisa, hlahlimililika masuisa tuahlu pakuvacuku
cucutahlana, sikilaliali caihli uvucungu maru ualu sikiamia.

umasasapa ia, uakikirimia hlamamana, asasapana hla umala hlalungu
takipuu'a iaukuta asasapana, kani'i ia sipatakuacahlia cucu'u
usumanu marucua umasasapaisa, uapapalucu saliri mavacungu ia, acahlicu
umasasapa, umurapu ia hlamama salia mahlava sulivucungu nua mapaci,
mahlukua taruarapana pakiau pitamu ruamiacu tarurapu, apahlaapa
pataluluvu cuculikanana takulusu taku'i'iaru, kuhlaisai kani'i
alupaliavaluna, maci talulupungu ia, uapapacu usahlu pukua vavarara,
kilaliali muaumumacu mahlitarurapicu ma aatu mariapucuna, takuamia
kani'i ia ahlahlaina muasa mumumahla, hlitakumiana tumua umauhlunu
alamuru ahlaina apahlimu ahlamu, kani'i pasamia muasacua hlahlahlusana
mahlukua sakurahlu parivutukuhlu sipapuhlaisa aanuisa, maci mariapucucu
pakiaturucua palunguna, sitakuamiaaisa maria uvucunguna, ma

mariauvucungu mualualu aari ia matialangicu hliarihlipia racu'u hla
rahlungu taruvuka, arisa ruavicicua hlamamana laulauvuisa hla mahlava
aruamiasa mapaci mahlukua uvuvucungua, kilaliali 'ihlicu langica
hla 'ihlicu sasaruanana pitamu, hla umahlukua hlakana'ana malitunulu
sia' u' uraisamana mii.

hliputunganuacua uvucungu ia kiacunguhlucu matasaku apikaunga,
apialangu imaru hlicuhluku mapaci hla ahlu'aiu hliapiamuhlua cahlu'u,
maripucua hlilumulumuka asavungana hla imaru hlicuhluku mapaci,
pavuhluvuhlu makukuacu 'uluvu maru vahlita kilaliali, kilupungu ia,
alucisa palungu pihlingina nua usumanuisa, acacani
iravaru pahlumuhlumu ru'avatu risaku, ruvanaisa kana'a, kilalialicu
mavavaru arisa kulupungu kumamahlipapu, misasumu tahliaria
makiahluhlucua hlimatasaku pihlingina, 'uluvu marikua salia kilaliali
mavavarua kilupungu, paaucu 'uluvu hliarivarua uvucungu,
maitativaua 'uluvuna maini tangusuhlu makuhlahluahlusu hla kilaliali,
macua imaru mapaci tangusuhlu ia, apahlavuisa 'uluvunaka hlaka liuhluisa.
mualavalavau usia vulahluna, kiakucucua cucutahlana miararumana kitaisa
apikaungana kialulupingicua sikilaliali ucani caihlina,
sikialavalavau kilaliali ia muruacukacu, tarisiacupucupingicua aucaucani
pihlingina musa murucuka.

(文章大意 僅供參考) ※字數限 200 字

小米的一生

拉阿魯哇除了有聖貝祭、捕魚祭之外，還有小米的歲時祭儀。過去主要食物就是小米，在經濟、宗教，不同面向都扮演了很重要的角色，從種植、照顧，乃至於收割、儲存，都有嚴謹的儀式動作需要執行，以求小米可以很順利、很平安的成長，並且結果豐富，餵飽族人。

小米的歲時祭儀共有八項儀式，分別為：開墾祭、播種祭、除草祭、收穫祭、進倉祭、祖靈嚐新祭、小米豐收祭與狩獵祭。小米歲時祭儀，不像聖貝祭那麼熱鬧，可是小米的歲時祭儀也一樣嚴謹，有著嚴謹的小米歲時祭儀，使得族人們可以延續生命，與自然和平共處。